

خطِ پولسِ بلده ایماندارای

کولسی

پیشگفتار

ای خطِ بلده جماعتِ ایماندارِ شارِ کولسی نوشته شده. کولسی دَ شرقِ اِفْسُس دَ تُرکیه امروزی موقِعیّت دشت. پولس خبر شُد که دَ مینکلِ جماعتِ ایماندارِ کولسی کسای جای گِرفته که خود ره ایماندارِ مَوگه ولے نییه. امو کسا مَوگفت که بلده شِنختونِ خُدا و نِجاتِ پَیدا کدو تنها ایمان دشتو دَ مسیح بس نییه، بلکه ارواح و قُدرت های روحانی ره ام باید پرستش کنی و احکامِ شریعت ره ام دَ جای بیری.

پولس قد امزی طرزِ فکرِ مُخالفتِ مونه و شخصیتِ مسیح ره بیان کده مَوگیه:

پولس دَ حالیکه ایماندارا ره امزی طرزِ فکرِ غَلَطِ باخبر

مُوكُنْه، امچنان اونا ره تشويق مونه كه زندگي خو ره مُطابقِ
تعليمِ عيسيٰ مسيح پيش بُره.

امي خط ره پولس د بِندي خانه نوشته كده از دستِ تيخيكاس
و اونيسيموس د كولسي ربي كد.

فهرستِ عنوانها

دُعا و سلام (فصل ۱ آيه ۱)

شُكرگزارى و دُعا (۳:۱)

شخصيتِ و بزرگي مسيح (۱۵:۱)

زحمتاي پولس بلده جماعتِ ايماندارا (۲۴:۱)

آزادى ايمانداراي مسيح از رسم-و-رواجاي دُنيايي (۶:۲)

اصول و مَقَرراتِ زندگي روحاني (۱:۳)

مَقَرراتِ بلده رابطه خانوارِ مسيحي (۱۸:۳)

سلام هاي آخري (۷:۴)

دُعا و سلام

۱ از طرفِ پولس كه د خاست-و-اراده خدا رسولِ مسيح

عيسيٰ آسته و از طرفِ برار مو تيموتائوس، ^۲ بلده برارون

مُقَدَّس و وفادار كه د مسيح تعلقِ دره و د شارِ كولسي آسته:

فَيْض و سَلَامَتِي آتِه مَوْ خُدا نَصِيب شُمُو شُنِه.

شُكْرگُزاري و دُعا

^۳ مَوْ هَميشه و خَتِيكه بَلدِه شُمُو دُعا مُونِي، خُدا ره كه آتِه

مَوْلای مَوْ عيسیٰ مَسِيح آسْتِه شُكْر-و-سِپاس مَوْگِي، ^۴ چُون مَوْ

دَ بارِه ايمان شُمُو دَ عيسیٰ مَسِيح و دَ بارِه مَحَبَتِي كه بَلدِه تمام

مُقَدَّسِين دَرِيد شَنِيدِے. ^۵ ايمان و مَحَبَت شُمُو بخاطر اُمِيدِي

آسْتِه كه دَ عالمِ باله بَلدِه شُمُو نِگاه شُدِه و شُمُو از گاه دَ بارِه

شي از كَلَام حَقِيقَت يَعْنِي از خوشخبري ^۶ كه دَز شُمُو رسيدِه

شَنِيدِيد. اُمُو رَقْم كه خوشخبري دَ تمام دُنيا ثَمَر دَدِه رُشد

مُونِه، اُمُو رَقْم دَ مِينَكَلِ از شُمُو ام از روزي كه اُو ره شَنِيدِيد و

فَيْضِ خُدا ره دَ راستي پِي بُرديد، ثَمَر دَدِه رُشد مُونِه. ^۷ شُمُو اُو

ره از اِيفِرَاس ياد گِرِفْتِيد، از هَمكارِ عَزِيز مَوْ و خِدْمَتگار

و فادارِ عيسیٰ مَسِيح كه از طرفِ از مَوْ آسْتِه. ^۸ اُو ام از مَحَبَت

شُمُو كه دَ وَسِيلِه رُوحِ اَلْقُدُسِ بَخَشِيدِه شُدِه، دَز مَوْ خَبَر دَدِے.

^۹ اَمزِي خَاطِر از روزي كه مَوْ اِي ره شَنِيدِے، مَوْ دَوامدار بَلدِه

شُمُو دُعا مُونِي و از خُدا مِيخاهِي كه شُمُو دَ وَسِيلِه هر حِكْمَت

و فامِيدگِي رُوحانِي از شِناختِ خاسْت-و-اِرَادِه اَزُو لَبَرِيز شَنِيدِيد

^{۱۰} تا بطوری رفتار کنیید که لایق مولا آسته و او ره کاملاً

خوشحال مونه و تا دهر عمل نیک پُرثمر بشیید و دشناخت

خدا رُشد کنیید. ^{۱۱} مو دُعا مونی که قد تمام قوتی که از

قُدرت پُر جلال ازو مییه، قوی شنید تا صبر و تحمّل کلو دشته

بشیید و قد خوشی ^{۱۲} از آته آسمانی شکرگزاری کنیید که او

شمو ره لایق ازی دَنست که د میراثِ مُقدَّسین د پادشاهی نُور

شریک شنید. ^{۱۳} او مو ره از چنگِ قُدرتِ تریکی نجات دد و د

پادشاهی باچه دوست-دشتنی خو آورد ^{۱۴} که د وسیله ازو مو

بازخرید شدی و بخششِ گناهای مو مهبیا شد.

شخصیت و بزرگی مسیح

^{۱۵} مسیح چهره خدای نادیده یه، اولباری و بزرگتر از تمام

مخلوقات، ^{۱۶} چراکه د وسیله ازو تمام چیزا د آسمو و د زمی

خَلق شد، چیزای که دیده موشه و دیده نموشه، چی تخت های

پادشاهی، چی مملکتا، چی حکمرانا، چی قُدرت ها؛ آرے،

تمام چیزا د وسیله ازو و بلده ازو خَلق شد. ^{۱۷} مسیح پیش از

پگ چیزا وجود دشت و د وسیله ازو پگ چیزا قد یگدیگه خو

وَصَل آسته. ^{۱۸} او سر جسم یعنی سر جماعت ایماندارا آسته؛

او ابتدا آسته، اولین کسی که از مُردهها دوباره زنده شد تا د

تمام چیزا پیش-قدم بشه. ^{۱۹} چُون رضای خُدا امی بُود که تمام پُوری خُوره دَ مسیح جای-د-جای کُنه ^{۲۰} و دَ وسیله ازو تمام چیزا ره قد خُو آشتی بدیه، چی دَ آسمو، چی دَ زمی. آرے، او دَ وسیله ریختندونِ خونِ ازو دَ رُوی صلیب، صلح-و-سلامتی ره دَ وجود اُورد.

^{۲۱} شُمو یگ وخت دَ فِکرای خُو دَ خُدا بیگنه و دُشمنون شی بُودید، مشغول دَ اعمالِ شریرانه، ^{۲۲} مگم آلی خُدا دَ وسیله جسمِ بشری مسیح از طریقِ مرگِ ازو شُمو ره قد خُو آشتی دده تا شُمو ره مُقدَّس و بے عیب و بدونِ ملامتی دَ حُضور خُو بیره، ^{۲۳} دَ شرطی که دَ ایمان خُو قایم و اُستوار منده ادامه بدید و از اُمیدی که دَ خوشخبری آسته و شُمو او ره شنیدید، دُور نشنید. ای امو خوشخبری آسته که بلده تمام مخلوقات دَ زیر آسمو اعلان شُده و ما پولس، خدمتگار شی شدیم.

زَحمتای پولس بلده جماعتِ ایماندارا

^{۲۴} آلی ما از زَحمتای که بخاطرِ از شُمو میکشم، خوشحال آستم و هر کمبودِ رنجِ های مسیح ره دَ جسم خُو تکمیل مونم، بخاطرِ جسمِ ازو یعنی بخاطرِ جماعتِ ایماندارا. ^{۲۵} ما دَ مطابق

وِظِيفَه كِه خُدا بِخاطِرِ از شُمو دَ عُهُدِه مه ايشْت، خِدمتگارِ
 جماعتِ ايماندارا شُدْم تا كلامِ خُدا ره بطورِ كاملِ اِعلانِ كُنْم،
 يعنِ اُمُو راز ره كه از زمانِ ها و نسلِ ها تاشه مَنَدَد، مگم^{۲۶}
 آلي بَلدِه مُقَدَّسِين شِي بَرَمَلا شُدِه. ^{۲۷} خُدا خاست كه بَلدِه ازوا
 معلومدار كُنه كه دَوْلَتَمَندي پُر جلالِ امزي راز دَ مينكل
 مردُمایِ غَيْرِ يهُودِ چيَقَس بَزُرگِ اَسْتِه، يعنِ اِي كه مَسِيحِ دَ
 زِنْدَگِي شُمو اَسْتِه، يگِ اُمِيدِ پُر جلالِ. ^{۲۸} و مو پَيغامِ مَسِيحِ ره
 اِعلانِ مُونِي و هر كس ره نَصِيحَتِ كده قد تمامِ حِكْمَتِ-و-
 داناييِ تَعْلِيمِ مِيدِي تا هر كس ره دَ ايمانِ شِي دَ مَسِيحِ بِالغِ
 كده دَ خُدا تَقْدِيمِ كُنِي. ^{۲۹} بَلدِه امزي مقصدِ ما زَحْمَتِ مِيكشُم
 و مُطابِقِ قَوْتِ اَزُو كه قُدْرَتَمَنَدانِه دَ و جُودِ مه كارِ مُونِه، تَپ-و-
 تَلالِشِ مُونُم.

۲ ما ميخاييم شُمو بَدَنِيد كه ما چيَقَس بَلدِه از شُمو و بَلدِه
 ايماندارايِ شارِ لائودِيكِيه و تمامِ كسايِ دِيگِه كه تا هنوز مَرِه
 رُويِ دَ رُويِ نَدِيدِه، زَحْمَتِ مِيكشُم ^۲ تا دِلِ هايِ پگِ تَشْوِيقِ
 شُنِه و پگِ دَ مَحَبَتِ اِتْحادِ-و-اِتْفاقِ دَشْتِه بَشِه و تا قد اِطْمِينانِ
 كاملِ از تمامِ دَوْلَتَمَندي فامِيدِگِي برخوردارِ شُدِه شِناخْتِ رازِ
 خُدا يعنِ مَسِيحِ ره حاصِلِ كنه، ^۳ كه تمامِ خزانِه هايِ حِكْمَتِ و

عِلْمَ دَ مَسِيحِ تَاشِهَ اَسْتَه. ^۴ مَا اِي رِه مَوگُم تَا هِيچ كَس شُمُو رِه
قَد تَوْرَاي نَرَم-و-چَرَب خُو بَازِي نَدِيه. ^۵ چُون اِگَرچِه جِسْمًا مَا اَز
شُمُو دُور اَسْتُم، وَلِه دَ رُوْح قَد شُمُو اَسْتُم و اَز دِيْدُوْن نَظْم-و-
تَرْتِيْب و مُسْتَحْكَم بُوْدُوْن اِيْمَان شُمُو دَ مَسِيحِ خُوْشْحَال اَسْتُم.

آزادِي اِيْمَانْدَارَاي مَسِيحِ اَز رَسْم-و-رَوَاج هَاي دُنْيَايِي

^۶ پَس اُمُو رَقْم كِه مَسِيحِ عِيْسَى رِه بَحِيْثِ مَوْلَايِ خُو قَبُوْل
كَدِيْد، اُمُو رَقْم دَ مُطَابِقِ رَاهِ اَزُو رِفْتَار كُنِيْد، ^۷ و دَزُو رِيْشِه
دَوْنْدِه اَبَاد شُنِيْد؛ و اُمُو رَقْم كِه تَعْلِيْمِ گِرْفَتِيْد دَ اِيْمَان خُو
اَسْتَوَار شُدِه اَز حُد كَلُو شُكْرگُزَارِي كُنِيْد. ^۸ اِحْتِيَاظ كُنِيْد كِه
كَس شُمُو رِه قَد فِلْسَفِه پُوچ و گُمْرَاه كُنْدِه كِه مُطَابِقِ رَسْم-و-
رَوَاج هَاي اِنْسَان و مُطَابِقِ اَصُوْلِ اِبْتِدَايِي اَزِي دُنْيَا اَسْتَه اَسِيْر
نَكْنِه، چِرَاكِه اِي چِيْزَا مُطَابِقِ تَعْلِيْمِ مَسِيحِ نِيْبِه. ^۹ چُون تَمَامِ
پُوْرِي اِلْهِي جِسْمًا دَزُو جَاي گِرْفَتِه ^{۱۰} و شُمُو اَم كِه دَزُو تَعْلُق
دَرِيْد تَكْمِيْل شُدِيْد. و اُو سِرِ هِر حُكُوْمَت و هِر قُدْرَت اَسْتَه.
^{۱۱} و اَمچِنَان، شُمُو دَ عِنْوَانِ اِيْمَانْدَارَاي اَزُو خَتْنِه شُدِيْد، خَتْنِه
كِه دَ وِسِيْلِه دِسْتِ اِنْسَان اَنْجَام نَشُد، بَلَكِه قَد بُر كَدُوْن طَبِيْعَتِ
نَفْسَانِي دَ وِسِيْلِه خَتْنِه اَنْجَام شُد كِه دَ مَسِيحِ تَعْلُق دَرِه. ^{۱۲} شُمُو
دَ وِسِيْلِه غُسْلِ تَعْمِيْد قَد مَسِيحِ دَفْنِ شُدِه دَ وِسِيْلِه اِيْمَان دَ

قُدْرَتِ خُدا که مسیح ره از مُرده ها دُوباره زنده کد، قد ازو
دُوباره زنده ام شُدید. ^{۱۳} وختیکه شُمو دَ خطاها و ناختنگی
طبیعتِ نَفسانی خُو مُرده بُوید، خُدا شُمو ره قد ازو زنده کد،
چُون اُو تمامِ خطاهای مو ره بخشید ^{۱۴} و نوشتِه ره که قد حُکمِ
قانونی دَ ضِدِ ازمو بُوَد، باطل کد و اُو ره دَ صلیب میخکوب
کده از بین بُرد. ^{۱۵} اُو حُکرانا و قُدْرَتِ ها ره خلعِ سلاح کد و
اونا ره بَرَمَلا رَسوا کد، چُون اُو دَ بِلِه ازوا دَ رُوی صلیب پیروز
شُد.

^{۱۶} امزی خاطر نیلید که هیچ کس بخاطرِ خوردنی یا وُچی کدنی
یا عیدها یا ماهِ نو یا روزِ آرام شُمو ره محکوم کُنه. ^{۱۷} امیا
تنها سایه چیزای امدنی آسته، لیکن اصل دَ مسیح تعلق دَره.
^{۱۸} نیلید که هیچ کس شُمو ره از اجر بے نصیب کُنه، یعنی
کسای که دَ خار کدونِ جِسْم و عِبَادَتِ ملایکه ها تاکید مونه و
غَرَقِ رویا های آسته که دیده و دَ وسیله فکرِ انسانی خُو
بے جای مغرور شده. ^{۱۹} امی کسا دَ سر یعنی دَ مسیح، چسپیده
نییه، دَ حالی که از سر تمامِ جِسْم قُوت میگیره و دَ وسیله
مَفْصَلِ ها و بنداها قد یگدیگه خُو یگجای نگاه موشه و قد
رُشدی که از طرفِ خُدا آسته، رُشد مَوکُنه.

۲۰ پس اګه شمو واقعاً قد مسیح نسبت د اصول ابتدایی ازی
 دُنیا مُردید، چرا رقیمی زندگی مونیډ که بګی هنوز د دُنیا تعلق
 درید و تابع مقرراتی موشید که مویګه: ۲۱ ”ای ره دست نرو!
 او ره مزه نکو! او ره غرض نګیر!“ ۲۲ تمام امزی چیزا ره که
 استفاده کُنی از بین موره؛ امیا مطابق احکام و تعلیم های
 انسانی آسته. ۲۳ اگرچه امی چیزا بخاطر عبادت داوطلبانه،
 فروتنی ظاهری و تپندون جسم یګ ظاهر عاقلانه دره، مګم
 بلده اداره کدون خواهشات نفسانی هیچ فایده ندره.

اصول و مقررات زندگی روحانی

۳ پس بخاطری که شمو قد مسیح دوباره زنده شدید، د
 طلب چیزای بشید که د عالم باله یه، د جایی که مسیح د
 دست راست خدا ششته. ۲ د باره چیزای که د عالم باله آسته
 فکر کنید، نه د باره چیزای که د روی زمی آسته. ۳ چون شمو
 مُردید و زندگی شمو قد مسیح د سایه خدا تاشه یه. ۴ وختی
 مسیح که زندگی مو آسته ظهور مونه، اوخته شمو ام قد ازو د
 بزرگی-و-جلال ظهور مونیډ.

^۵ امزی خاطر، هر چیزی که د وجود شمو دنیایی آسته، او ره نابود کنید: زنا، ناپاکی، هوی-و-هوس، خواهشات شیرانه و حرص ره که بت پرستی آسته. ^۶ بخاطر امزی چیزا قار-و-غضب خدا د بله مردمای نافرمان نازل موشه. ^۷ شمو ام یگ زمان د امزی راه ها قدم میزدید، وختیکه د مطابق ازوا رفتار موكدید. ^۸ لیکن آلی پگ امزی چیزا ره ایله بدید، یعنی قار، غضب، کینه و تهمت زدو ره؛ و امچنان تورای زشت ره از دان خو دور کنید. ^۹ د یگدیگه خو دروغ نگید، چراکه شمو طبیعت کهنه ره قد اعمال شی قتی از خود دور کدید. ^{۱۰} و خود ره قد طبیعت نو پوشندید که د شناخت تازه شده موره، تا هم رنگ خالق خو شنه. ^{۱۱} د امزی طبیعت نو د بین یونانی و یهودی، ختنه-شده و ناختنه، بربری و سکیتی و د بین غلام و آزاد فرق نییه، بلکه مسیح تمام چیز آسته و د پگ وجود دره.

^{۱۲} پس رقم انتخاب شده های مقدس و دوست-دشتنی خدا خودون ره قد دلسوزی، مهربانی، فروتنی، ملایمت و صبر-و-حوصله بپوشنید. ^{۱۳} یگدیگه خو ره تحمل کنید و اگه کدم شمو از دیگه خو گله دشته بشید، یگدیگه خو ره ببخشید. امو رقم که مولا شمو ره ببخشید، امو رقم شمو ام یگدیگه خو

ره بُبُخْشِيد. ^{۱۴} د بَلَه پگ امزیا مُحَبَّت ره بُوْشِيد که تَکْمِيل
 کُنْدِه تَمَام چيزا آسْتِه. ^{۱۵} بيليد که آرامشِ مَسِيح د دل های
 شُمو حُکمرانی کُنَه، چرَاکه شُمو بَلدِه امزی مقصد د يگ جِسْم
 کُوی شُدِيد؛ و شُکرگزار بَشِيد. ^{۱۶} بيليد که کلامِ مَسِيح قد
 اَرزِشِ بے اندازِه خُو د و جُود شُمو جای بَگِيرِه؛ يگدِيگِه خُو ره
 قد حِکْمَتِ کَامِل تَعْلِيم بَدِيد و نَصِيحَت کُنِيد. قد زُبُور خاندو،
 حَمْد-و-تَنَّا و سُرُود های رُوحَانِي د وَسِيلَه فَيضِي که د دل های
 شُمو آسْتِه، خُدا ره سِتَائِش کُنِيد. ^{۱۷} و هر چيزی ره که اَنجَام
 مِيدِيد، چي د کُفْتار، چي د کِرْدار، تَمَام شِي ره د نَام مَوْلَا
 عيسی اَنجَام بَدِيد و د وَسِيلَه اَزُو خُدا يَعْنِي آتِه آسْمَانِي ره
 شُکر-و-سِپَاس بُوْگِيد.

مُقَرَّرَات بَلدِه رَابِطَه خَانَوَارِ مَسِيحِي

^{۱۸} آي خَاتُونُو، تَابِع شُويُون خُو بَشِيد، اَمُو رَقْم که د نَظَرِ مَوْلَا
 مُنَاسِب آسْتِه. ^{۱۹} آي شُوی ها، خَاتُونُوی خُو ره مُحَبَّت کُنِيد و
 قد ازوا اَوَاقَات تَلْخِي نَکُنِيد. ^{۲۰} آي بچکِيچَا، از آتِه-و-آبِه خُو د
 هر کار اِطَاعَت کُنِيد، چرَاکه اِي کار مَوْرِدِ پَسَنْدِ مَوْلَا آسْتِه.
^{۲۱} آي آتِه-گو، بچکِيچَايِ خُو ره سِرِ قَار نَکُنِيد، نَشْنَه که اُونَا
 دِل-مِيدِه شُنَه.

۲۲ آی غلاما، از بادارای جسمانی خو د هر کار اطاعت کُنید،

نه تنها وختیکه زیر نظر اَسْتِید رقم کسای که رضایتِ انسان ره طلب مونه، بلکه از تی دل اطاعت کُنید و از مولا بترسید.

۲۳ هر کاری ره که انجام میدید از دل-و-جان انجام بدید رقمی

که بگی بلده مولا کار مُونید، نه بلده انسان. ۲۴ چون شمو

میدنید که از مولا یگ میراث د عنوانِ اجر د دست میرید،

چراکه شمو مولا مسیح ره خدمت مُونید. ۲۵ هر کس که بد

کنه، سزای بدی ره که کده مینگره و د پیش خدا طرفداری وجود ندره.

۲۴ آی بادارا، قد غلامای خو عادلانه و د انصاف رفتار

کُنید، چون شمو میدنید که شمو ام د عالم باله یگ بادار

درید.

۲ د دُعا پایبند بشید و متوجه بشید که قد شکرگزاری قتی

بشه. ۳ و د عینِ وخت بلده ازمو ام دُعا کُنید که خدا یگ درگه

ره بلده رسندونِ کلام واز کنه تا مو بتنی رازِ مسیح ره اعلان

کُنی که ما بخاطر شی بندی اَسْتُم. ۴ دُعا کُنید که ما امی راز

ره بطورِ واضح برملا کُنم، امو رقم که بلده مه فرض اَسْتِه. ۵ د

برابر کسای که از بُرو آسته عاقلانه رفتار کده امزُو فرصت
خُوب اِسْتِفاده کُنید. ^۶گفتگوی شُمو همیشه پُرْفیض و سَنجیده
بَشه تا بَدَنید که دَ هر کس چی رقم جواب بَدید.

سلام های آخری

^۷تِیخیکاس شُمو ره از تمام احوال مه باخبر مونه. او برار
عزیز، خِدمتگارِ وفادار و همکار مه دَ خِدْمَتِ مَولا آسته. ^۸ما
او ره بلده امزی مقصد دَ پیش شُمو رِبی مُونم که شُمو از
احوال مو باخبر شُنید و تا او شُمو ره دِل-جمی بَدیه. ^۹او ره قد
اونیسیمس، برارِ وفادار و دوست-دَشْتَنی مو که یکی از شُمو
آسته، قَتی رِبی مُونم. اونا دَ باره تمام چیزای که دَ اینجی رُخ
میدیه بلده شُمو مَوگیه.

^{۱۰}اَرِسْتَرخُس که قد ازمه یگجای بَندی آسته و مَرَقَس باچه
کاکای بَرنابا شُمو ره سلام مَوگیه. دَ باره مَرَقَس بلده شُمو
هِدایت دَدِه بُوْدُم که هر وخت او دَ پیش شُمو اَمَد از شی
پذیرایی کُنید. ^{۱۱} و یسوع که دَ نام یوستس یاد موشه، ام شُمو
ره سلام مَوگیه. تنها اینمیا از جم یهودیا دَ مینکل همکارای
مه آسته که بلده پادشاهی خُدا کار مونه و اَمیا باعث آرامش

مه شُده. ^{۱۲} ایپفراس که یکی از شُمو و خِدمتگارِ مسیح عیسی

آسته، شُمو ره سلام مُوگیه. او همیشه دَ دُعاهای خُو بلده

شُمو جدی دُعا مونه تا دَ ایمان بالغ شُنید و دَ پی بُردونِ تمام

خاست-و-اراده خُدا کاملاً مُتقیقین شُنید. ^{۱۳} ما دَ باره ازو

شاهدی میدیم که او بخاطرِ از شُمو و ایماندارای لائودیکیه و

هیراپولیس غدر زحمت میکشه. ^{۱۴} لوقا طیبِ دوست-دشتنی و

دیماس شُمو ره سلام مُوگیه.

^{۱۵} بلده برارونی که دَ لائودیکیه آسته و بلده خوار مو نیمفا و

جماعتِ ایماندارا که دَ خانه شی آسته، سلام های مَره برسَید.

^{۱۶} وختیکه ای خط بلده شُمو خنده شد، توح کُنید که بلده

جماعتِ ایماندارای لائودیکیه ام خنده شُنه و شُمو ام خطی ره

که بلده لائودیکیه نوشته شده بخانید. ^{۱۷} دَ آرخیپس بُگید:

”توح کُو، خِدمتی که دَ راهِ مولا دَز تُو دده شُده، او ره تکمیل

کُنی.“

^{۱۸} ما پولس، امی دُعا-و-سلام ره قد دِستِ خود خُو نوشته

کدیم. دَ یاد دشته بشید که ما بندی آسْتَم. فیض نصیب شُمو

شُنه. [آمین.]

سوال داريد؟ +1 807.700.6090 

آزگي © afghanbibles.org

Copyrighted material not for reprint/publishing purposes.